



GOVERNUN KONSTITUSIONÁL BA DA-IV SEKRETARIA ESTADU KONSELLU MINISTRU

KOMUNIKADU IMPRENSA

Sorumutu Konsellu Ministrus 4 Novembru 2010

Konsellu Ministrus hala'o sorumutu iha Kuarta-feira ida ne'e, loron 4 fulan Novembru tinan 2010, iha Sala Sorumutu Konsellu Ministrus nian, iha Palásiu Governu, iha Díli, no halo aprovasaun ba:

1. Rezolusaun ne'ebé Aprova Kontinjente Anuál ne'ebé inkorpora iha F-FDTL

Efetivu anuál ne'ebé atu inkorpora iha tinan 2011, ba FALINTIL-Forsa Defeza Timor-Leste (F-FDTL), sei hala'o tuir prosedimentu inkorporasaun úniku, 600 (atus neen) ba feto ka mane.

Kapasidade atu jera rekursu umanu hirak kualifikadu husi Forsa Armada sira, daudaun ne'e, labele liu inkorporasaun rua ba ema 300 (atus tolu) feto ka mane ba tinan ida nian, tanba atu hala'o prosedimentu ba inkorporasaun rua anuál presiza mobiliza meu barak, laós de'it umanu maibé mós materiál no lojístiku sira, tanba ne'e Konsellu Ministrus deside prosedimentu inkorporasaun úniku ba tinan oin mai.

Atu hanoin de'it katak, F-FDTL sei iha hela faze reorganizaun no dezenvolvimentu atu kumpri objetivu hirak estabesidu iha orientasaun estratéjika (FORSA 2020) sira nian.

2. Rezolusaun kona-ba Rekrutamentu Auditór sira ba Kámara Kontas Tribunál Superiór Administrativu, Fiskál no Kontas.

Rekrutamentu, formasaun no kapasitasaun profisionál ba licenciadu sira ne'ebé sei integra ba futuru kuadru auditór Seksaun Kontas Tribunál Superiór Administrativu, Fiskál no Kontas, sei dezenvolve de'it tuir dependénsia eskruziva Ministra Justisa nian, sei respeita ba lejislasaun aplikável, nune'e mós ba prinsípiu ne'ebé konsagra tiha ona iha Estatutu Funsau Públika.

Atu hateten lolós katak, Governu Konstitusionál ba Dhaat, haka'as an atu harii no implementa projetu kriaun Seksaun Kontas Tribunál Superiór Administrativu, Fiskál no Kontas – tribunál ida ne'ebé hanesan órgaun superiór ierarkia ba tribunál administrativu, fiskál no kontas sira, ne'ebé kompete mós, hanesan instánsia únika, fiskalizaun ba legalidade despeza públika no julgamentu ba kontas Estadu nian.

Projetu ne'e sei dezenvolve ho kolaborasaun husi Tribunál Kontas Portugál nian, tuir Memorandu Entendimentnu ne'ebé halo ona, no ba efeitu ida ne'e, Ministériu Justisa Timor-Leste nian iha hanoin atu rekruta foin-sa'e timoroan ne'ebé halo hotu ona licenciatura atu tuir kursu spesífiku kona-ba formasaun no kapasitasaun profesionál. Kursu hirak ne'e ninia durasaun mínima mak fulan tolu no sei halo iha Tribunál Kontas Portugál nian. Prevee tiha ona mós realizasaun estájiu Profesionál iha ezersísiu efetivu funsaun nian, ho durasaun tinan ida. Iku liu, hein katak, licenciadu foin sa'e hirak ne'e, sei integra iha futura kareira auditor iha Seksaun Kontas nian iha Tribunál Superiór Administrativu, Fiskál no Kontas nian.

Haree ba prioridade projetu no ba spesifisidade rekrutamentu ne'e nian, Konsellu Ministru konsidera katak, situasaun partikulár ida ne'e, bele hasai husi rejime jerál kona-ba rekrutamentu funsionáriu públiku, no sei dezenvolve no depende liu ba Ministériu Justisa.

Konsellu Ministru halo mós analize kona-ba:

1. Apresentasaun kona-ba Estratéjia Dezenvolvimentu

Apresentasaun ida ne'e, ne'ebé Profesór Amérika-Norte nian, husi Universidade Kolómbia, Jeffrey Sachs, mak halo hotu, mosu iha sekuénsia husi ninia apresentasaun ida uluk, iha reuniaun lora 31 fulan Marsu liubá nian, ba Konsellu Ministru ho nia título : “Moris kiak nia rohan – Hadoop Timor-Leste husi Konfliktu iha Dalan Dezenvolvimentu nian” (“The end of Poverty – Moving Timor-Leste away from conflict towards Development”). Liu husi ida ne'e, Profesór Jeffrey Sachs fó nia vizaun ba Governu kona-ba dezenvolvimentu Nasaun nian, hodi apresenta planu kona-ba prioridade hirak ne'ebé importante ba país ne'e iha faze ida ne'e.

2. Prosesu Demarkasaun Fronteira Rai-maran

Konsellu Ministru rona ona ekipa husi Ministériu Negósiu Estranjeiru nian ne'ebé dezenvolve hela negosiasaun kona-ba delineamentu fronteira rai-maran nian ho indonézia atu halo hotu prosesu ne'e no define liña atuasaun nian iha prosesu ida ne'e.

3. Rejime Kompensasaun nian ba husik mamuk Imovel sira Estadu nian

Ho objetivu atu rezolve sitausaun okupasaun la lejítima no/ka ilegál bein imóvel sira Estadu ninian, Konsellu Ministru hakarak kria mekanizmu ne'ebé atu repoen legalidade kona-ba pose, maibé, sei minimiza impaktu sosiál ne'ebé bele mosu ho medida hirak ne'ebé atu foti.